



Na te peresideni Thomas S. Monson

## E Amuiraa Faahou

*Te haamauruuru nei au ia outou no to outou faaroo e to outou itoito i te evanelia, no te here e te haapa'o ta outou e faaite te tahi i te tahi e no te taviniraa ta outou e horo'a nei.*

I te taima a mana'ohia'i teie fare, ua mana'o matou eita roa matou e faaoti i te reira. A hi'o na ra i teie nei.

E to'u mau taea'e e mau tuahine here, e mea maitai i te farerei faahou â a haamata ai tatou i te hanere vau ahuru-ma-hoê-raa o te amuiraa rahi matahiti a te Ekalesia a Iesu Mesia i te Feia Mo'a i te Mau Mahana Hopea Nei.

E au ra ua tere oi oi noa na ava'e e ono i mairi a'e nei a rave ai au i te mau hopoi'a e rave rahi. Te hoê o te

mau haamaitairaa rahi i roto i taua taima ra o te haamo'araa ia i te hiero nehenehe no Laie Hawaii, tei faaapî-roa-hia fatata e piti matahiti te maoro. Ua apeehea vau e te peresideni e te tuahine Henry B. Eyring, te taea'e e te tuahine Quentin L. Cook, e te taea'e e te tuahine William R. Walker. I te pô hou te haamo'araa, tei tupu i te ava'e novema ra, ua mata'ita'i matou e 2.000 feia apî no te mataeinaa no te hiero a faa'i ai ratou i te Cannon



Activities Center i te Fare Haapiiraa Teitei no BYU-Hawaii e ua ori mai ratou no matou. Te i'oa no ta ratou ha'utiraa o « Te Vahi Haaputuputuraa » ia tei faati'a nehenehe mai i te aamu o te mau mea tei tupu i roto i te Aamu o te Ekalesia e te aamu o te hiero. Auê ia arui faahiahia e !

Te mahana i muri mai o te hoê ia ta'urua varua a haamo'ahia'i te hiero i





roto i na oro'a e toru. Ua tae rahi mai te Varua o te Fatu i rotopu ia matou.

E tamau noa matou i te patu i te mau hiero. Te oaoa nei au i teie po'i-po'i ia faaara'tu e toru faahou hiero o te faanahohia ra te mau vahi e, i roto i te mau ava'e e te mau matahiti i mua nei, e patuhia i te mau vahi i muri nei : Fort Collins i Colorado ; Meridian i Idaho ; e i Winnipeg,

Manitoba i Canada. E mea papû e riro te reira ei hoê haamaitairaa no to tatou mau melo i roto i teie mau vahi.

I te mau matahiti atoa e rave rahi milioni oro'a e ravehia nei i roto i te mau hiero. Ia tamau noa tatou i te itoito i te raveraa i taua mau oro'a ra, eiaha no tatou ana'e, no to tatou atoa râ mau taata tei herehia e tatou o te

ore e nehenehe ia rave i te reira no ratou iho.

Te tamau noa nei te Ekalesia i te horo'a i te tautururaa i te tau ati. Aita i maoro a'e nei, ua tupu to tatou aroha e ua tauturu atu tatou i te nunaa no te fenua Tapone i muri a'e i te aueueraa fenua e te miti faa'i e te mau fifi no te mau fare haamaniraa uira atomi. Ua opere matou hau atu i te 70 tane

tauhaa, mai te maa, te pape, te mau ahu mahanahana, te ro'i, te mau mea no te ea, te ahu e te mori arahu. Ua horo'a ta tatou feia apî paari i to ratou taime no te ma'imi i te mau melo tei mo'e ma te faaohipa i te Itenati, te mau rave'a apî no te tuatiraa e te tahi atu â mau rave'a apî no te para-parauraa. Ua horo'a te mau melo i te tauturu na roto i te faaohiparaa i te mau pereoo tataahi uira tei horo'ahia e te Ekalesia, i te mau vahi e fifi i te haere na ni'a i te pereoo uira. Ua faanahohia te mau opuaraa tauturu no te faaineine i te mau puohu no te ea e te mau puohu tamâraa i roto i te mau tîti e te mau paroita e rave rahi i Tokyo, Nagoya e Osaka. E tae noa mai i teie nei, hau atu i te 40.000 hora taviniraa tei horo'ahia e na hau atu i te 4.000 taata. E tamau noa â ta tatou tautururaa i te fenua Tapone e i roto i te tahi atu mau vahi e hinaarohia.

E to'u mau taea'e e mau tuahine, te haamauruuru nei au ia outou no to outou faaroo e to outou itoito i te evanelia, no te here e te haapa'o ta outou e faaite te tahi i te tahi e no te taviniraa ta outou e horo'a nei i roto i ta outou mau paroita e te mau amaa e te mau tîti e te mau mataeinaa. Maururu atoa ia outou no to outou haapa'oraa i te aufauraa i ta outou tuhaa ahuru e te mau ô e no to outou maitai i te horo'araa no te tahi atu mau tufaa moni a te Ekalesia.

I te hopea matahiti 2010 te vai ra e 52.225 misionare e tavini nei i roto e 340 misioni na te ao taatoa nei. Te ohipa misionare o te toto ora ia no te basileia. Te parau atu nei au, e mai te mea e nehenehe ia outou, a feruri i te horo'a i te tahi moni i te Afata Misionare a te Ekalesia.

I teie nei, te mau taea'e e te mau tuahine, ua ineine tatou i te faaroo i te mau parau poro'i o te hohorahia mai i mua ia tatou i teie mahana e ananahi. Ua imi te feia o te a'o mai ia tatou i te tautururaa e te arata'iraa a te ra'i a faaineine ai ratou i ta ratou mau parau poro'i. Ia î tatou i te Varua o te Fatu e ia haamaitaihia e ia faauruhia tatou a faaroo ai e a haapii ai tatou o ta'u ia pure. Na roto i te i'oa o Iesu Mesia ra, amene. ■



**Na Elder L. Tom Perry**

No te Pūpū no te Tino Ahuru Ma Piti Aposetolo

## Te Sabati e te Oro'a

*Ia î to outou utuafare i te here a faatura ai outou i te sabati i te mahana taatoa e ia ite outou i te mau haamaitairaa varua i te taatoaraa o te hepetoma.*

**E** to'u mau taea'e e mau tuahine na te ao atoa nei, ua haere mai tatou i teie po'ipo'i e faaroo i te reo o te hoê peropheta. Te faaite papû atu nei au e te reo ta outou i faaroo iho nei o te reo ia o te peropheta ora a te Atua i ni'a i te fenua nei i teie mahana, peresideni Thomas S. Monson. Ua haamaitai-mau-hia tatou e ta'na mau haapiiraa e to'na hi'oraa maitai !

I teie matahiti ua farii paatoa tatou i te rave'a no te tai'o i te mau parau a te mau peropheta i roto i te Faufaa Apî i te Haapiiraa Sabati. Te Faufaa Tahito râ o te hoê ia tuatapaparaa i te mau peropheta e te hoê nunaa taata, ua faatumuhia te Faufaa Apî i ni'a i te oraraa e te mana o te hoê ana'e Taata o tei haere mai i roto i te tahuti nei e to'na na ti'araa taata toopiti i te ra'i e i te fenua nei—to tatou Faaora e Taraehara, o Iesu Mesia.

No te î o te ao nei i teie mahana i te mau haapiiraa a te taata nei, e mea ohie ia haamo'e e ia ere i te faaroo i roto i te aamu faufaa rahi roa no ni'a i te oraraa e te taviniraa a te Faaora—Te Faufaa Apî. Ua riro teie nei buka mo'a ei haapûraa no te aamu o te mau papa'iraa mo'a, mai te Faaora Iho i riro ei haapûraa no to tatou mau oraraa. E ti'a ia tatou ia fafau ia tatou iho ia tai'o e ia faaherehere i te reira !

Te vai nei te paari faufaa rahi o te itehia na roto i to tatou tai'oraa i te Faufaa Apî. Ua oaoa noa na vau i te tai'oraa i te mau aamu no Paulo a tere ai e a faanahonaho ai oia i te Ekalesia, e ta'na ihoa ra mau haapiiraa ia Timoteo. I te pene maha o te mau papa'iraa a Paulo ia Timoteo, te tai'o nei tatou : « E tuu hua'tu, e e haapii hua'tu i teie nei mau parau... Ei haapa'oraa râ oe na tei faaroo ra, i te parau, i te haere'a, i te aroha, i te huru o te aau, i te faaroo, i te viivii-ore ». <sup>1</sup> Aita e nehenehe ia'u ia feruri i te hoê rave'a maitai a'e no tatou no te haamata aore râ no te tamau noa i te riroraa ei hoê hi'oraa maitai no tei faaroo ra maori râ ta tatou haapa'oraa i te mahana sabati.

Haamata ana'e i te hamani-raa-hia o te ao, ua faataahia te hoê mahana taa ê atu i te tahi atu mau mahana. « Ua haamaitai ihora te Atua i te mahana hitu ra, e haamo'a tura i te reira ». <sup>2</sup> Ua faaea te Atua i Ta'na ohipa i taua mahana ra, e ua titau Oia i Ta'na mau tamarii ia na reira atoa. Ua horo'a Oia i te mau tamarii a Iseraela te faauerua :

« E haamana'o i te mahana sabati ia haamo'ahia ia.

« E ti'a ia oe ia haa, e ia rave i ta oe mau ohipa atoa i na mahana e ono ra :

« Area te mahana hitu ra, o te sabati ia no to Atua ra...